


5391



CVV


CVV
M

STANISLAI
CARNCOVII

EPISCOPI VLADIS-
LAVIENSIS.

AD

HENRICVM VALESIVM
POLONIARVM REGEM DES.
PANEGRICVS.



PARISIIS,

Apud Michaelem Vascōsanum.

M. D. LXXIIII.

CVM PRIVILEGIO.

Sim. Que. 5391.

S. W. 136



Apud Michaelem Valscolanum.

M. D. LXXIII.

CVM PRIVILEGIO.



STANISLAI CARNOVII,
EPISCOPI ULADISLA-
VIENSIS,

AD

HENRICVM VALESIVM PO-
LONIARVM REGEM DES.

Panegyricus.

SI AVT res ipsa id desideraret, aut
verò per rationes regni publicas lici-
tum nobis id fuisset, Serenissime Rex,
profectò nihil libentius hoc tempore
fecisset tum Senatus ipse amplissimus,
tum Equester ordo vniuersus, quàm vt frequentes
admodum hunc in locum, honoris tui gratulationis-
que causa, confluerent, & lætitiã, quam ex hoc fe-
lici tuo ad se aduentu capiunt, præsentem pro se quis-
que testarentur. Verùm quoniam & rei quidem ipsi
aliter satisfieri posse videbatur, & præsens status tem-
porum Reipub. nostræ, tantum concursum in hoc
loco, quantus ex omnium ordinum hominúmque
conuentu futurus erat, non ferebat: idcirco nos vice

A ij

STANISLAI CARNCOVII

omnium ablegati sumus, qui his partibus apud te pro omnibus defungeremur. Quod fanè, pro eo ac debemus, facimus, téque Regem à nobis prius expetitur, mox electum, nunc verò tandem ad nos felicibus auspiciis aduentatè, omnium nomine summa cum veneratione excipimus, & exceptum optimis omnibus ominibus prosequimur, aduentumque hunc tuum verè & ex animo, cum tibi, tum reipub. nostræ gratulamur. At quanta quæso alacritate animorum? Equidem si nos spectas, quos coràm intueris, tanta alacritate, quàm maximam capere animi nostri possunt: sin eos, à quibus tibi obuiam prodire iussi sumus, profectò nulla est tanta dicendi copia, quæ incredibilia illorù erga te studia verbis consequi, nulla tanta ingenij vbertas, quæ immensam illam lætitiæ vim, quam ex omnibus tuis rebus bonis capiunt, satis comprehendere posse videatur. In quo campum, mehercule, illum Varsoviensem, qui electioni tuæ dicatus fuit & consecratus, appellamus: qui quidem donec præterlabentis Vistulæ fluctibus allueretur, testis erit locupletissimus egregiæ nostræ erga te familiamque tuam regiam voluntatis. Appellamus etiam in eo cum vniuersum illud electionis tempus, quod consiliorum actionumque nostrarum ad tuam gloriam destinatarum fuit conscium, tum verò in primis faustam illam, & in omnè posteritatem Gallici Polonicique nominis memorandam diem, qua te, concordibus admodum omnium non
solum

solùm ordinum, sed etiam hominum suffragiis, Regem nostrum renunciauimus: quæ quidem dies testis est, eritque in perpetuum, nostræ non modò de tua virtute, industria, sapientia, felicitate, præclarissimæ opinionis: verumetiam de rebus tuis prosperis, & ad voluntatem fluentibus, singularis gratulationis. Etenim cùm primùm in ipso electionis nostræ initio, sanctum Dei Spiritum solenni hymno supplices de more venerati essemus, vidisses cõfestim, alios præ gaudio, & iam tum erga te studio singulari, lachrymas fundere, ac pro te Deo Opt. & Max. vota nuncupare, alios hastas suas liliis tuis candentibus insignire: audisses verò deinde alios extra suffragia, suis vocibus tuum nomen assiduè ingeminantes: alios autem in media ferèdorum suffragiorum religione, ita nomini deuotos & addictos tuo, vt, nisi tu Rex noster eligereris, actum esse propemodum putarent de repub. ipsa vniuersa. Quid dicam, te Rege electo & renunciato? Muta, mediusfidius, ipsa & inanima, campi, syluæ, prata, nemora, agri, fluuij, ripæ, laudes tuas, permisto tum hominum applausu, tum auium concentu, tum equorum hinnitu, personare quodammodo videbãtur. Atque hæc quidem, etiam tum absente te, & Rupellana obsidione ita in Gallia occupato, vt in illo strepitu armorum, vix Polonia nostræ meminisse posses, apud nos sic fiebant: quid nunc censes, cùm te, opem, salutem, præsidium, & vt vno verbo dicam, Regem nostrum, saluum & inco-

STANISLAI CARNOVII

lumem, ad regnum tibi diuinitus decretum, & à nobis delatum, aduenisse, ceteri passim omnes audiunt, nos verò, quos hîc publico nomine coràm adesse vides, etiam præsentes intuemur? Equidem vt gustum iam nunc aliquè habere possis eius lætitię, qua omnes regni ordines, sacri, profani, summi, medij, infimi, ex aduentu isto tuo prospero & salutari perfunduntur, recensebo tibi breuiter totius electionis nostrę rationem. Sic enim te ipsum, & paulò antè diuinitus ad inclyti huius regni gubernacula, summa nostra voluntate electum ac vocatū esse intelliges, & nunc aduentantem, singulari cum studio excipi à nobis, & regno inuitari perspicias & cognosces.

Ac mihi quidem tribus potissimùm temporibus eluxisse videntur in hac electione singularia tum Dei Opt. Max. de te iudicia, tum gentis quoque ac nationis nostrę erga te studia. Nam & renunciationem ipsam electionis antecesserunt nonnulla eiusmodi, quę iam tum nostrorum hominū erga te studia non obscure præferre videbantur: & deinde, tam in renunciatione ipsa electionis, quàm post renunciationem etiam ipsam, ea consecuta sunt, quę maximo tibi argumento esse debeant ardentissimę nostrę erga te voluntatis. Quę tu sanè hoc loco dum breuiter cognoscis, debebis profectò & honorem quidem Domino Deo debitum tribuere, & nos quoque ex eiusmodi nostro merito, pro singulari tua humanitate adamare.

NAM

NAM cùm Respublica nostra tribus maximè hominum ordinibus contineatur, Regia potestate, quæ imperat: Equestri ordine, qui parèt: & Senatorio, inter hos interiecto, qui consulit: profectò exempto ex rebus humanis Rege Sigismundo Augusto, ita vt nullus tum alius nobis superesset Rex, siue natura factus, quod est prorsus à legibus & moribus nostris alienum, siue electione nostra designatus: constabat in vniuersum, omnem regendæ & administrandæ reipub. rationem ad Senatum & ad Patres necessariò rediisse: vt pote quorum ætas, dignitas, conditio, alterius illius in repub. alioqui honestissimi ordinis ætatem, dignitatem, conditionem, sine dubio antecellat. Cùmque adeò inter Patres ipsos, magna quædam & præcipua excellentia ac præstantia singularis, Archiepiscopis Gnesnensib. legibus ac moribus regni nostri sit attributa: qui & Rege ipso viuo primas partes secundum eum in regno obtinent, & eo vita functo, omnia publica consilia moderantur more maiorũ: hoc quidem in omnes partes tutius, quòd, cùm inter Ecclesiasticos homines, quibus persona regia rectè imponi non potest, censeantur, à suspicionem regni affectati prorsus sint remoti. Inde factum est, vt redacta sanè repub. Rege mortuo in Senatus potestatem, vt diximus, confestim data sit à nobis opera, vt conuentus Senatorum cùm alibi, tum Louicij in primis septimo ferè post Regis obitum die, & deinde aliquanto post Varsovia, per nos haberentur.

STANISLAI CARNCOVII

Quibus quidem vtrisque in conuentibus cùm Archiepiscopus ipse non solùm interesset, verumetiam vti oportuit, præesset, prouisum est diligenter, præter cætera quæ ad futuri regis electionem pertinebāt, vt modus quoque & ratio inuestigaretur, atque etiã de sententia omnium præscriberetur, tum regni finium milite firmandorum, tum iudiciorum denique domi constituendorum per tempus Interregni. Vt ita duo firmamenta duobus illis malis opponerentur, quæ tum temporis Regno ipsi maximè impendere, & maximum periculum creare posse videbantur. Nam & mores profectò ipsi impunitate superiorum temporum corrupti, licentiam magnam in populo generauerant, quæ necessariò videbatur esse rigore iudiciorū astringenda: & desuetudo præterea rei militaris in animis nostris, quos non mediocriter ocio illo diuturno elanguisse, hostes ipsi persuasum habebant, facilè, per hanc occasionem regis mortui, incursiones eorum in hoc regnum potuit excitare: quæ sanè, nisi terrore armorum & præsidiorum nostrorum opposito, rectè reprimi non potuerunt. Itaque duabus his rebus perfecimus, Rex, vt per totum hoc Interregni tempus, quod fuit, vt scis, plusquã annuū, regnum ipsum primò integrum, nec quicquam ex eo statu, in quo à moriente rege relictum fuit, per hostes externos diminutum, deinde verò nullis nouis difficultatibus domesticis implicarum, per Dei gratiam conseruauerimus. Quæ res si
 fortè

fortè olim non vsque adeò ad te pertinuit, cùm tu necdum Rex noster creatus esses, nec inter competitores regni nostri solus numerarè, nunc planè diuinitùs tota cessit in beneficium tuum: cùm regnum ipsum per Dei gratiam inis incolume, & nullis recens excitatis difficultatibus impeditum. Sed quid postea factum est? Dicam, vt iam propiùs res ipsas tuas contemplari incipias. Quæ enim hæcenus dicta sunt, ea magis ad constituendas interregni rationes, ante noui Regis electionem, quàm ad electionem ipsam videntur pertinuisse. Cæterum constituto iam ex S. C. die & loco eiusmodi electionis, constituto autem ad Varsouiam in campo Camionēsi, ad diem Aprilis quintam, conuentum est magno Senatorum & infinito Equitum numero: qui quidem conuentus eiusmodi, omnium intuentium oculis, delectus cuiuspiam frequentissimi, vel potius centuriatorum Romanorum Comitiorum speciem repræsentare videbatur. Vbi exauditis ante omnia, in maximo tabernaculo, quod de industria cõmunibus omnium Palatinatum negociis militariter positum ac præparatum fuit, externis legationibus, quæ sanè nec pauca numero, nec dignitate mediocres erant: à plerisque enim summis orbis terrarum Principibus & Monarchis missæ & ablegatæ fuerunt: posteaquam à Nobilitate ad electionem conclamatum, & ab Archiepiscopo Gnesnensi, qui semper habitus est princeps & os Senatus, decretum ac pronunciatum esset,

B

STANISLAI CARNOVII

vt in singulorum Palatinatum tentoria, quæ maximo illi tabernaculo vicina, circumcirca fixa fortè ac locata erant, veluti in tribus quasdam & classes discederetur: tum repetitis summam capitibus singulorum legationum externarum in singulis Palatinatibus, propter eos qui exponendis illis aut adesse ipsi tam frequenti numero, aut verò etiam cum adessent, exaudire fortè eas non potuerunt: & repetitis quidem per Senatores ipsos, ac eos præterea quos Nobilitas ipsa ex se, ad exaudiendas & sibi referendas legationes eiusmodi, iam antea designarat, itum est in suffragia. In quibus ferendis (libenter enim ea persequimur, quæ ad demonstrandam singularem huius istius electionis nostræ cautionem videntur pertinere) ea moderatione vsi sumus, vt neque quisquam nostrum suffragio excludi, neque idem exaduerso libertate sua abuti videretur. Dixit enim qui voluit, & quod voluit, & quãdiu voluit, Senatoribus tamen præcuntibus, & varietatem sententiarum conciliantibus, & candidatorum numerum ad minimum, quoad eius fieri potuit, redigentibus, & denique nomina tum candidatorum, tum suffragatorum, in scriptum referentibus, & sigillis præterea cuiusque obsignantibus: sic tamen, vt mutandæ suæ cuique sententiæ potestas ad extremum remaneret. Quid tum postea? O singularem & planè diuinam sortem tuam! Referuntur tabellæ suffragiorum scriptæ & obsignatæ, in maximum illud tabernaculum, & in conspectum
 Senatus

Senatus vniuersi. Leguntur & recitatur nomina tam candidatorum, quàm suffragatorum. Ecce autem primam honoris tui prærogatiuam. Vincis enim, HENRICE, iam tum quoque, & superas suffragiorum numero Competitores omnes: & vincis quidem sic, vt, si numero solo standum esset, tu reliquos omnes, illo iam ipso tempore, longo post te interuallo relinqueres, & ipse sine mora Rex euaderes. Verum id quoque, ad maiorem laudis & gloriæ tuæ materiam ac segetem, aliquantisper dilatum fuit. Nam cum Deo in primis Optimo & Max. qui tui capitis tuique honoris singularem curam gerit, deinde nobis etiam ipsis, qui te Regem habituri eramus, parum visum esset, te numero solo suffragiorum Regem designari, nisi etiam ponderibus ipsis & momentis suffragiorum à nobis designarere, inita est altera quoque Regis eligendi ratio, à moribus planè aliarum, cum veterum tum recetium benè ordinarum Rerumpublicarum, minimè aliena, vt nimirum sui cuique candidato veluti patroni & aduocati ex Senatoribus constituerentur, viri non magis auctoritate quàm prudentia & eloquentia insignes, qui causam candidati cuiusque ita cum omni verborum honore tuerentur, vt acerbitati quidem verborum in alienum candidatum parceretur, momenta autem honestatis, vtilitatis, & aliarum rerum ac rationum omnium, quæ in hominum deliberationibus versari consueuerunt, diligentissimè excuterentur. Vt ad eum

STANISLAI CARNOVII

iam modum non tam fauor cum fauore, aut studium cum studio, quàm res cum re, causa cum causa, ratio cum ratione, argumentum cum argumento, ex propinquo configere videretur. Seuerum & graue disceptandi genus, addo etiam fortassis rigidum: sed quò rigidius, hòc & nostris sanè rebus conducibilius, & tibi, Rex, qui hoc etiam contentionis genere superior, Deo fauente, euasisti, honorificètius. Quid enim factum est? Principiò, nostratium plerique, viri & claritate familiarum præstâtes, & meritis in Rempub. insignes, qui inter competitores, fauore nonnullorum ex Equestri ordine erant nominati, vltro se eo fauore abdicarunt: vel quòd iam tunc tibi ac dignitati tuæ excellenti, volentes concederent, vel quòd omninò videri nollent, suo se siue iussu, siue conatu, siue adèò voluntate, inter competitores regiae dignitatis fuisse nominatos. Deinde illorù quoque magna pars, qui aliis candidatis (vti accidere necesse fuit, in tam ampla & libera republica) studere non obscure videbantur, exaudita illa ac perpensa conflictione rationum, non inuiti de priore sententia sua decesserunt, & in te suffragia contulerunt. Ita cùm cæteri quidem sententias suas desererent, tui autem suffragatores in sententia permanerēt, factum est, vt sicut prius numero, ita tunc pondere quoque suffragiorum, reliquos omnes cõpetitores anteires, & reipsa Rex iam propemodum fieres. Restabant enim pauci partium contrariarù: quibus cùm odiosa
illa

illa ac permolesta causarum conflictione iterum pugnare, cum ex mutuo amore esse non videretur, neque suadendo quicquam amplius proficeretur, gratia & rogando in partes tuas sunt pertracti. Dederunt enim hoc precibus & auctoritati Senatus, qui id ab eis assurgens postulauit, dederunt modestiæ suæ, dederunt denique communi concordia, vt in te non inuiti quoque ipsi consentirent. Ita iam ex eo tempore Rex noster electus & designatus es, & regnum, quod antea, partim dispositis per confinia praesidiis integrum, partim constitutis per Palatinatus iudiciis expeditum conseruabatur, in incertum tum adhuc quidem, Quem regnare velit heri, quem uic ferat fors, id tibi deinde potissimum decretum à nobis, & quasi diuinitus adiudicatum est, summa cum nostri erga te amoris, summa etiam cum diuinæ beneuolentiæ testificatione. Quid enim siue à nobis, siue à Deo etiam ipso immortalis, in hac mortali vita tua illustrius ad tuam laudem excogitari potuit, quam te vnum, ex tot gratiosissimis ac potentissimis Competitoribus, tanta varietate & copia suffragiorum bis, concorditer, non ab vna aliqua prouinciarum, sed ab omnibus prouinciis, nec à prouinciis tantum, verum etiam à singulis propemodum hominibus (quæ res non tantum effectu est admirabilis, sed etiam ratione ipsa) tanti & tam late patetis regni Dominum, ac Regem denique nostrum esse designatum? Quæ cum ita se habeant, eritne adhuc obsecro quispiam,

qui ea, quæ in hac tam exquisita electionis ratione, tam accuratè & tam diligenter gesta sunt, aut ad temeritatem fortunæ referat, aut, quod etiam multò faciat impudentius, vel fraudi alicui occultæ, vel denique apertæ ipsi vi tribuenda existimet? Quid habet, quæso, fortuna commune cum suffragio libero? quid rei est temeritati cum ratione? quid fraudi cum consilio? quid vi cum precibus? Quod si quid etiam esset, agè referat mihi saltem quisque oculos paulisper ad illas tum nostras inter nos acres admodum & nimium seueras in hoc genere inquisitiones. Deus bone, quid prætermisum est ad inuestigandas, si quæ essent, latebras talium consiliorum? quid in iis non quæsitum? quid non productum in medium? quid non excussum ab omnibus? quid non ad fastidium, vsque examinatum ac expensum est? & tamen nihil repertum est eiusmodi, quod non modò rem, sed suspicionem saltem aliquã verisimilem venditi cuiquam aut promissi, aut etiam vi expressi suffragij habere videretur. Atque hæc sunt quidem primi temporis, nostræ erga te obseruantia, & diuinæ denique beneuolentia, non obscura argumenta.

Sequitur tempus alterum, in quo singularia nostra erga te studia, & multò etiã magis diuina ipsa beneficia eluxerunt. Est autem tempus renunciationis ipsius: quam ego sanè breuiter sic exponam. Electio & designatio tua, de qua modò loquuti sumus, in diem cam incidit, quæ fuit pridie Pêtecotes,

diei solennissimæ, & apud Christianos omnes religiosissimæ. Incidit autem in tempus vespertinum. Nihil vetabat amplius, quominus iam ita non modò electus ac designatus, sed etiam omnibus rationibus cuictus, & ab reliquis omnibus competitoribus solus defensus ac vindicatus, Rex euestigiò promulgare & renunciarere: & certè, vt id ita fieret, multa simul non solum desiderare, sed etiam poscere ac cõtendere videbantur. Quid igitur obstitit, quominus fieret? Num tribuum fortasse fauor repentè commutatus? Minimè. Fremebant enim vno ore omnes, & renunciationem tui summa cum contentione flagitabant. Num igitur aduersariorum competitorum potentia? Nequaquam. Hi enim aut nulli iam tum fuerant, aut omnem profectò contentionem abiecerant. Num igitur Archiepiscopi Primatis, cuius illud renunciandi munus fuit proprium atque legitimum, aut alienus, aut alioqui minus promptus animus? Ne id quidem. Is enim non modò ad promulgandum & renunciandum ex officio suo, sed etiam ex singulari studio, ad refutandum, si quis fortè moram afferat, paratum se esse ostendebat. Quid igitur? Equidem nihil planè eiusmodi, quod iusta aliqua ex causa rem impedire potuisse videretur: illud potius, quod non solum impedire aut morari non debebat, sed etiam, quòd maximè mirum est, tantò magis vrgere rem & accelerare debebat, Sol occasus & serum ipsum diei: cùm videlicet homines

STANISLAI CARNCOVII

non solùm publica, sed etiam priuata sua, nec solùm iam facta & finita, verùm etiam inchoata & imperfecta, ad exitum tantò celeriore student deducere. Sed nimirum hominis nescio cuius leuissimi metus ob oculos versabatur hominibus tui studiosis, ne esset deinde, qui te, vt est his nostris temporibus admodum dicax sæculum, ex caligine & tenebris erutum, & obscurum nescio quem in hanc lucem regni subitò protractum Regem esse conuiciari possit. Res igitur dilata est in diem perendinum. Si aut exemplum quæras, aut rem ad rationem reuoces, nihil alienius: sin exitum spectes, nihil admirabilius. Quæ enim ratio reperiri potest, cur certa iam res, & omnibus suis numeris absoluta & confecta, à calce denuò ad carceres reuocari, & infinitis rursus casibus, ac nouis rerum conuersionibus fieri debuerit obnoxia? aut verò quàm multa tandem, ex omni omnium annalium memoria exempla proferas, differendæ, non dico in diem, sed vel in horam saltem eiusmodi promulgationis? vbi præsertim electio ipsa omnibus in rebus rectè atque ordine gesta & administrata fuerit. Et tamè, quod alias non ferè solet euenire, id, cùm de tuo honore ageretur, euenit, promulgatio ipsa & renuntiatio electionis perfectæ tuæ, vt in diem perendinum differretur. Quid igitur? Nunquis nos casus aduersus interpellauit? num quæ, vel leuissima saltè, conuersio remorata est diuinam siue electionē, siue adèò renunciationē tuam? Minimè id quidem. Nam
cum

cùm deinde, vno pòst interiecto die, ad comitia intermissa rediissemus, etsi aliis quibusdam de rebus còtrouersia non deessent, de te tamen Rege controuersia nulla prorsus extitit. O diuinam in rebus mortalium curā, & prouidentiam immutabilem & æternam! O diuini & singularis fauoris erga te specimen diuinum & admirabile! O insigne testimonium ad perpetuitatem, eos qui Deo fidunt, in mediis etiam rerum motibus & concussionibus, elusum non iri! Itaque sanè nulla interposita mora, Gnesnensis Archiepiscopus iure & prærogatiua sua, QVOD TIBIQVE, NOBISQVE, REIQVE PVBLICÆ NOSTRÆ, GALLICOQVE ET POLONICO NOMINI, TOTIQVE ADEO ORBI CHRISTIANO, BONVM, FAVSTVM, FELIXQVE SIT, præfatus cùm esset, te Regem nostrum verbis solennibus de more renunciauit. Quem ipsum deinde aliquot diebus interiectis Marsalci regni sequuti sunt: qui more & consuetudine maiorum, renunciatum per tribus publicarunt. O faustos ac felices dies illos! O latas nostras acclamations! O gratissimas tum Deo immortalis supplicationes nostras, cùm renunciatione per Archiepiscopum facta, euestigiò inde moti, magno concursu ex campo in urbem facto, templum urbis primarium certatim adiuissemus, & eidem illi præpotenti Deo, cui olim suffragia initari sanctè ac religiosè supplicaueramus, gratias de te tuo nomine supplices atque gaudio la-

STANISLAI CARNOVII

chrymabundi egissemus. Nunc quoque, Serenissime Rex, apud te hæc mihi memorāti, vis ingens lachrymarum prorumpere ex oculis videtur, monumentū gaudij lætitiæque nostræ & supplicis ac gratæ nostræ erga diuinam maiestatem voluntatis. Quo quidem in loco tu quoque ipse, maximè vellem, vt intimis in præcordiis conceptam gratiarum actionem tuam reddas nobiscum Deo Opt. & immortalī: qui tibi in hoc quasi secundo actu electionis tuæ, manifestissimis iudiciis præsentem admodum sui numinis vim declarauit, & nostram quoque singularem erga te deuotionem nutu suo approbavit, eamque tibi in perpetuum commendauit. Omnibus enim lætitiis profectò tum incessimus, & HENRICVM Regem iterumque iterumque nominari, dici, cieri, promulgari iussimus. Iuuabat vsque HENRICVM, iuuabat Galliam, iuuabat denique Lilia iterari: & HENRICVM ipsum quasi oculis, Galliam auribus, Lilia denique ipsa naribus quodammodo nostris admo-
ueri. Cùm interea temporis accersuntur tui Oratores ad constituendum nobiscum de propositis olim nomine tuo conditionibus. Vt hoc etiam tibi maximo argumento esse queat, non tam cōditiones vllas, aut vlla promissa tua tuorumue, spectata fuisse à nobis in te eligendo, quàm virtutem modò & industriam ipsam tuam, quæ sunt veræ tuæ, vnicè à nobis in te adamatæ dotes: illud, inquam, tibi maximo argumento esse debeat, cùm audias, prius te & electum,
& de-

& designatum, & renunciatū à nobis fuisse Regem, quàm de conditionibus ipsis Electionis, designationis, renunciationis tuæ, cum tuis Oratoribus per nos transigeretur.

RESTAT actus veluti tertius & postremus, eorum quæ hanc istam gloriosam, & ad omnem posteritatem memorandam renunciationem tuam fuerunt consecuta. In quibus quidem recensendis hoc erimus etiam breuiores, quò & oratio sanè ipsa ad exitum iam properat, & res ipsæ, quas commemoraturi eramus, tibi quoque ipsi non multò minus quàm nobis, notæ sunt & perspectæ. Etenim cùm iam diutius gaudium lætitiàmque nostram, quam ex illa non magis tui quàm nostri honoris accessione capiebamus, continere quasi in animis nostris non possemus, duo euestigiò fecimus: vnum, quòd eius rei nuncium subitò ad te, per literas & celeres admodum tabellarios, variis itineribus misimus: alterum, quòd statim post, Oratores quoque ipsos ac Legatos nostros, ex primoribus Senatorij & Equestris ordinis delectos, inuitandi ac postulandi tui causa, publico nomine, cum decreto electionis factæ, ex Polonia in Gallias vsque ablegauimus. Quorum vtrūque quale fuerit, non necesse habeo apud te dicere. Nam & literæ ipsæ nostræ, quod scimus, in manus tuas peruenerūt, & Oratores quoque nostri tecum hîc reduces comparènt: iactati illi quidem, vnà cum literis, Per varios casus, per tot discrimina rerum, vt ait poëta:

sed certè & nostræ quidem erga te singularis obseruantia tanta vis fuit, vt nihilominus in illa variorum casuum discrimina, mittendos esse tot & tantos viros, talésque & eiusmodi literas arbitraremur: & simul hanc nostram erga te obseruantiam illud diuinæ gratiæ ac beneuolentiæ manifestum indicium est consecutum, vt non solùm literæ ipsæ redditæ tibi fuerint, sed etiam ipsum XIII Legatorum nostrorum collegiũ, inter tot externas, & cùm spaciis ipsis terrarum à nobis disiunctas, tùm verò lingua etiam ac moribus abhorrentes nationes, in tantis maris & terrarum interuallis, vniuersum propemodum vltro citróque saluum atque incolume commeare, & legationē conficere, & ad nos deinde redire potuerit.

QVÆ quidem, Rex, omnia cùm ita sint, debes profectò, quod toties dicimus, tum officia studiæque hæc nostra, tum multò etiam magis diuinas illas gratiæ & beneuolentiæ erga te significationes, gratissima vicissim tua beneuolentia prosequi: ita planè, vt & ea, quantum maximè potes, facta & tecta conserues, quæ sunt Dei immortalis, qui te sua propemodum cœlitus demissa voce, ex mediis belli periculis ereptum, & ad hunc regium honorem accersitum, suis etiam manibus, in regio ipso folio iam iam collocabit: & rursus, vt quæ nostra sunt, ea nobis, qui singularia Dei ipsius de honore tuo decreta atque iudicia, votis etiam ac studiis nostris libentes atque volentes prosecuti sumus, virtute tua conficias ac representes

præsentes. Et cum vna iustitia duæ eæ res, quas dixi, vberimè contineantur, iustitiam assiduè præ oculis habeas, eaque semper actiones omnes tuas, in tribuendo tum Deo quod Dei est, tum nobis quod nostrum est, moderè. Quid est autem quod Deo debeas? illud equidè, vt arbitror, vt, cum is vno eodè-que tempore non magis in Gallia salutis tuæ, quàm honoris in Polonia, paternam curam gesserit, neque minus potèter ibi te à periculis defenderit, quàm hïc ad dignitatè regiam prouexerit, & ames cum tu quidem vt patrem, & metuas vt dominũ. Quæ vtraque si ita coniunxeris, vt & priuatim ipse, quod tamen enixissimè facere te audimus, castè cum & religiosè semper colueris, & publicè honorem ipsius nauiter vbi-que tutatus fueris, tum & ipsi illi abundè quod suum est reddideris, & solium prætereà ac sedem tuam regiam mirificè firmaueris. Nobis autem, qui secundũ Deum honorè tuũ honore regio auximus, qui que te nobis Regem ac dominũ præfecimus, quidnam est quod potissimũ debeas? Equidem id opinor, quod nos præcipuè à te expectamus. Quid est autem quod tantoperè expectemus, nisi fortè id, quod dudum etiam in te eligendo secuti fuimus? Quid est igitur quod secuti fuimus? Num vt Regè haberemus longa serie atavos reges numeratè? atqui alij etiam æquè clari non defuerunt nobis aliunde. Num vt eum haberemus, qui accessionem nouæ alicuius ditionis regno nostro adiungeret? atqui possessionũ abundè

nobis est: & earum sanè accessiones per se non faciūt regnum beatum. Num igitur vt haberemus, qui cæteros omnes orbis Christiani Reges ac Principes, vigore ætatis, formæ principatu, diuitiarum copiis, & reliquis id genus naturæ atque fortunæ blandimentis anteiret? Multò minus, nec enim ea sunt propriè regia. Quid igitur potissimum spectauimus? Nihil planè aliud, quàm idem illud, cuius ipsius gratia, pro salute incolumitateque tua, obsecrationes, orationes, postulationes, gratiarum actiones, tum hucusque ad Deum, magna cum animi nostri summissione, fudimus, tum deinceps etiam, quoad vixeris, semper fundemus: vt videlicet tuis auspiciis quietam & tranquillam vitam degamus in omni pietate & honestate: quorum altero securitas ab externis hostibus continetur, vt tranquillè scilicet, & sine eorum metu viuamus: altero, vt viuamus scilicet piè & honestè, securitas continetur à domesticis inimicis. Quæ duo quò sunt difficiliora, hòc magis nobis dux eiusmodi & auctor opus fuit, de quo hæc rectè sperari, & à quo etiam certò expectari posse viderentur. Non vereor, ne quis hæc tui aut excitandi, quod minimè est opus, aut multò etiam minus, quod fieri non potest, deterrendi causa, à nobis dici existimet. Quis enim aut detertere queat pectus tuum generosissimum, & ad omnes labores ac pericula pro republica excipienda natum? aut verò excitare necesse habeat viuendam virtutem tuam, & ad omnem laudem & gloriam à natura

tura ferè ipsa procreata? Nihil hîc oratoriè agimus: id quod res est loquimur, & quæ tui muneris sunt, ea tibi quàm breuissimè ob oculos ponimus. Quæ ipsa tu præstabis sanè non difficulter nobis, vbi voles: hoc faciliùs autem nobis quàm aliis, quòd ei genti imperaturus es, quæ regum ac principum suorum dicto audiens, quæque præscripto rectæ rationis & virtutis ita natura addicta est, vt huius quidem studio ipso & ardore, facilè in omni officio contineatur, illorum autem reuerentia & amore, libentius & efficacius quàm pœnis aut imperio vlllo seueriore, in omne honestum inducatur. Aderit tibi ad hæc & suscipienda, & gerenda, & perficienda, aderit inquâ, non solùm corporibus, sed etiam multò magis animis, Senatus ipse, numero frequens, promptus studio, auctoritate verò & gratia ita pollens, vt propter gratiam, nomen Fratrum maiorum, propter auctoritatem verò nomen Patrum & custodum reipublicæ, communi omnium appellatione meruerit. Quos tu si in propria ordinis ipsorum auctoritate & gratia conseruaueris, habebis profectò, qui conatus omnes tuos pro reipub. salutare, studio, consiliis, conatibus denique suis prosequantur: vel, quoniam illi in hoc corpore reipub. sub te capite, cordis locum obtinent, vitam proculdubiò omnibus tuis in reipublica honestis institutis affatim largiètur. Aderit etiam non minus libenter quàm diligenter Equester ordo ipse, qui in corpore hoc reipub. manuum tuarum

STANISLAI CARNOVII

instar habet: cuius tu quidem ordinis si vires inspi-
cias, vnicum regni tui robur atque firmamentum,
sin splendorem & libertatem, insigne eiusdem decus
& ornamentum iurè appellaueris: vtroque autem
nomine thesaurum rectissimè dixeris, ac opes regni
tui incomparabiles atque inexhaustas. Et alterius
fanè ordinis prudentia atque consilio nunquam à
recto aberrabis, alterius studio & obedientia, domi
eris amabilis, foris admirabilis: vtrorumque autem
virtute & concordia, vbique omnia quæ voles facil-
limè consequere. Tūne autem (quæso) adolescens,
regnum Gallia, fraternum potius quàm tuum, diffi-
cillimis temporibus, vnus propemodum tua virtute,
ita administrare potuisti, vt tumultus ibi maximos
compressisse, regiam maiestatem vindicasse, popu-
los illos æquo iure continuisse, disciplinam veterem
reduxisse, pacem & ocium desideratum regno resti-
tuisse perhibere: & dubitabis nunc iam factus ma-
turius, ac rebus illis gerendis etiam exercitator, in
tuo ipsius regno minimè desperatis, & certè non
pessimis tēporibus, auctore Senatu, adiutore Eque-
stri ordine, ea te posse in animis Polonorum obse-
quentissimis, & ad omnem ductum rectæ rationis
admodum morigeris, imprimere, quorum vestigia
admodum illustria in Gallorum non solùm menti-
bus, sed etiam vrbibus, singulari tua virtute posuisti?
Equidem, quod verè dicendum est, tum demum
Gallicis illis tuis rebus gestis plenam fidem concii-
liaueris,

liaueris, cùm illarum similitudinem in hoc quoque tuo Polonico Imperio ad viuum expresseris ac repræsentaueris. Tum demum te ratione potius & consilio, quàm casu & fortuna, res illas gessisse homines sibi persuadebunt, cùm eiusdemmodi res tuas gestas hîc apud nos intuebuntur. Tum demum nos fructum electionis tuæ exoptatum consecutos esse fatebuntur, cùm res nostras tua virtute in meliorem statum esse adductas non poterunt inficiari. Quaprofctò in re si & officio tuo, Rex, & expectationi omnium nostrûm satisfeceris, tùm & apud nos quidem cum tibi amorem conciliabis, vt libenti animo non solùm fortunas & facultates nostras, iubente te exponere, sed etiam pectora & latera nostra hostibus pro te opponere, & vitam denique ac sanguinem nostrum pro vita & sanguine tuo profundere parati futuri simus: & foris prætereà apud vicinas omnes & externas gentes atque nationes, Rex eris per Dei gratiam clarus, honoratus, potens, inuictus.

ATQVE nos ea quidem spe freti, vti te antea expectauimus, deinde elegimus, mox renunciauimus, tum promulgauimus, denique per literas & Oratores ac Legatos nostros ex Gallia ad hoc regnum inuitauimus ac postulauimus, ita nunc iam præsentem, & intra regni nostri fines constitutum, omni non solùm verborum honore, sed etiam animorum cultu & veneratione, iterum atque iterum salutamus, tibi que hunc primum in hoc regnum ingressum benè atque

feliciter euenire cupimus, téque adeò vti magnum
quendam angelum, ad regimen & custodiam populi
Dei cœlitùs demissum, excipimus, atque tibi iam
nunc non solùm honorem regium exhibemus, sed
etiam ipsa regni insignia regiæ inaugurationis pro-
pria, promptissimis animis despondemus, omniùm-
que ordinum & statuum studia atque officia, totùm-
que adeò Regnum ipsum, cū omnibus eius Prouin-
ciis, ad te deferimus, & tibi etiam atque etiam com-
mendamus, vtque nos omnes, exemplo antecesso-
rum tuorum Regum nostrorum, gratia atque bene-
uolentia tua prosequaris, rogamus.

I tua, Rex, quò te virtus vocat, i pede fausto.

Exaudiat te Dominus in die tribulationis: prote-
gat te nomen Dei Iacob. Mittat tibi auxiliũ de San-
cto, & de Sion tueatur te. Intellectum tibi det, &
instruat te in via qua gradiaris, & firmet super te o-
culos suos. Teneat manu dexteram tuam, & dedu-
cat te in voluntate sua.



VIDI FABRI, DOMINI

A PIBRAC, AD SUPERIOREM

PANEGYRICVM

Responſio.

REVERENDISSIMI & Illustrissimi Senatores, Vellem equidem, tantum in me eſſet ingenij, indiſtriæ, & facultatis in dicendo, vt ſi minus copioſè & eleganter, ſatis tamen commodè interpretari, & explicare Latinè poſſem ea, quæ mihi nunc ſacraſſima Sereniſſimi Regis Poloniæ Maieſtas præcepit vt exponerem. Sic enim & officio meo non omninò defuiſſe viderer, & vobis (ſcio) dilucida & aperta, quantumuis nudâ & ſimplex, Regiæ voluntatis ſignificatio, non modò iucunda eſſet, verum etiam honeſtos animorum veſtrorum ad decus & laudem impetus, magnoperè inflammaret, & ſpecie ſua in animis omnium, qui huc publico nomine cõueniſtis, mirabiles amores excitaret ſui. Hoc vnum igitur mihi primùm, deinde vobis dolendum eſt, quòd ſuſcepto, aut veriùs, impoſito muneri impar, dum Regij ſermonis dignitatem aſſequi & refer-

D ij

re frustra laboro, vos eo fructu carebitis, qui iucundissimus futurus erat, si directò ad vos peruenisset, nec aliena, hoc est mea, cultura acerbior factus, de vi sua & innata facultate penitus decidisset. Verùm, ut hoc sit, aggrediar ad rem ipsam: in qua illud primùm occurrit, de quo etiam priore loco dici à me Rex voluit: Ex multis scilicet diebus, quos in vita celeberrimos lætissimòsque viderit, hunc esse clarissimũ. Potest quidem ille iure suo, & solet non sine magno voluptatis sensu, eius temporis meminisse, cuius vos memoriam posteriore orationis parte quodammodo renouastis, cùm omnium Gallorum votis, præcipuo autem & singulari Christianissimi Regis, Fratris sui, studio & impulsu, perditis & afflictis propè rebus nostris, ingentem Imperij Gallici molem, vixdum adolescens suscepit, susceptam fortiter sustinuit, & ab Aula in Senatum, à Senatu in Castra deductus, primo aditu & còspectu suo, labantem & inclinatam Rempub. fulcire visus est: & fractos ac prostratos omnium bonorum animos in tam certam spem erexit, ut iam ferè oculis cernere, & manu propè tenere viderentur, quæ postea felicissimè & gloriosissimè sunt consecuta. Habet item iucundissimam recordationem dies altera, in qua cæso & deletò, ad internecionem vsque, copiosissimo hostiũ exercitu, non modò præsentia, verũ etiam futura bella cõfecit, & priscam fortissimorum quondam Imperatorum laudem, iuuenis adæquauit. Nec certè tertia illa dies præteriri potest, qua

qua Lutetiæ Parisiorū, hoc est, in oculis Gallia, & in luce Europæ, inter faustas omnium ordinum & ætatum acclamationes à Reuerendissimo, Illustrissimis & generosissimis viris, inclyti huius Regni Polonia Legatis, quos hîc reduces videtis, post publicam amplissimi & honorificentissimi Decreti recitationem & traditionem, Rex auspicatò solennibus verbis renunciatus est, & decreti vestri tabulis incumbens, tanquam accepto Imperij symbolo & tessera, in civilem Regni possessionem animo est ingressus. Sed neque illius dici celebritas, quæ maxima fuit, nec reliquarum quas commemoravi lætitia, cum hac conferri & comparari potest. Quantum enim magna distât exiguis, dubia, certis: quantum inter spem, & rei cupitæ adeptionem & fruitionem interest: quantum futura præsentibus, efficta & adumbrata veris & solidis cedunt corporibus: quantum denique naturalia præstât civilibus, tantum aliishodierna lux antecedit necesse est: quæ meliore & candidiore lapillo dignissima, quod in reliquis nutare videbatur, ratum & fixum esse iubet: quæ Regi Rempub. suam, Reipublicæ Regem suum ostendit, quæ non chirographis, non tabulis nuptiarum, aut instrumentis, in quibus plerunque legi Cornelia locus esse solet, sed re vera, sponso amabili, formosissimæ, comptissimæ, ornatissimæ, charissimæ & dilectissimæ sponsæ suæ complexum, iucundè nunc primùm tribuit. Nulla vnquam veteribus sapientibus visa est aptior ratio significan-

dae & explicandae necessitudinis ac coniunctionis,
 quae Regi cum Repub. intercedit, quam quae ducitur
 ex firmissimo nexu, & sacrosancto foedere nuptia-
 rum. Omnis quippe humani diuinique iuris fit in
 vtraque coniunctione perpetua quaedam & religiosa
 comunicatio: sic tamen vt ex altera liberi mortales
 & caduci procreentur, ex hac verò certior & firmior
 proles gignatur, tot scilicet ciuium, quot Imperium
 capere potest, salus, felicitas & beata vita. Vxorem,
 corpus: vxoris caput virum Christus appellat: Sic
 Rempublicam corporis vicem obtinere, & in Repub.
 instar capitis Principem esse cum dicimus, non pro-
 phanum aliquid ex placitis tantum Philosophorum
 enunciamus, sed in Maiestatem Dei summi intuentes
 in ea que defixi, cuius voce humanorum imperiorum
 omnis ratio constituta est & sancita, vnitatem in Prin-
 cipis & Reipublicae coniunctione ita significamus,
 vt tamen singularum partium ex quibus totum corpus
 coalescit, distincta esse munera & officia existime-
 mus. Iam ergo nunc (quemadmodum cepi dicere)
 Serenissimus Rex Poloniae, voti sui tandem compos,
 non inuito & languenti animo, sed cupidè & ar-
 denter, suae se miscet & inserit Reipublicae, suae se,
 Galliarum immemor, adiungit (heu!) nimium amate
 & dilectae coniugi Poloniae, cuius excellentem for-
 mam, & diuinam propè speciem nunc tacitus ad-
 miratur: in qua agnoscit antiquissimae nobilitatis di-
 gnitatem, ab innumeris retro seculis gloriosa stem-
 matum

matum serie repetitam : à qua denique amplissimam
copiosissimam, pretiosissimam & incomparabilem
dotem sperat: quid dico, sperat? imò benè cautam &
sibi oblatam videt, imò hodie integrè numeratam,
vtraque tenet manu, tot scilicet Religiosissimorum
Antistitum, tot Illustrissimorum & sapientissimo-
rum Senatorum, tot fortissimorum & nobilissimo-
rum Equitum, fidem, amorem, benevolentiam, cha-
ritatem, & ad omne ingenuum & liberale officij &
obsequij genus, paratissimam, promptissimam, &
obsequentissimam voluntatem. Errant certè non pa-
rùm, sed HENRICI Regis vestri iudicio maximè
errât, qui portoria, qui tributa, qui vectigalia, qui in-
gentes, & inexhaustos pecuniarum annuos redditus,
inter dotalia Reipub. potissimùm numerant. Ita se
ille vel à natura imbutum, vel à doctrina & maiorum
exëplis institutum & instructum esse profitetur, vt
ciuium suorum & subditorum charitatem, & bene-
volentiam, veram ac solam putet esse dotem: hanc
potissimùm sibi expetat, hanc perpetuam cupiat esse:
eius fruendæ desiderio iuueniliter & impotenter ex-
ardescat, eius augendæ & amplificandæ (si quid ta-
men ad eam addi possit) occasiones omnes vrgere ve-
lit: eos denique solos Principes diuites & beatos esse
putet, qui cum ciuibus suis honesto & glorioso cer-
tamine, mutuis scilicet benevolentia & amoris offi-
ciis, perpetuò contendant, & cum subditos suos cha-
rissimorum filiorum loco habeant, ab illis quoque

DOMINI A PIBRAC

vicissim tanquam optimi parentes diligentur. Hæc fuit semper iam inde à puero Regis Serenissimi sententia, idem quoque vobis nunc videri, ex oratione vestra satis intelligit. In re verò grauiissima suum cum vestro iudicio consentire non modò latatur, verùm etiam inde facilè colligit, quanta posthac futura sit in Imperij administratione, animorù, studiorum, & voluntatum consensio. Cæterùm quid anno superiore in eligendo Rege secuti sitis, & quid nunc expectetis, copiosè & ornatè à vobis dictum est: nec illa præteritarù rerum commemoratio, collati beneficij exprobrationem habere visa est, sed potius singulare quoddam in maximis negotiis gerendis prudentiæ & sapientiæ vestræ testimonium. Huc enim illud pertinet (ni fallor) vos in eligendo Rege, & in ferendis suffragiis, mentem & cogitationem à rebus leuissimis abduxisse, nec spectasse vires corporis in Henrico, nec florem ætatis, nec stirpem Regiã, nec opes, nec diuitias, nec Gallicum ingens patrimonium, aut prouinciarum accessiones, nec reliqua huius generis bona: si modò bona dici possunt, quæ Sapientes vix vnquam isto nomine appellarunt, & quæ adeò fluxa & imbecilla putantur, vt sæuientis fortunæ ne stridorem quidem ferre possint. Virtutem igitur solam in tribuendo Imperio secuti estis, nec aliud quicquam præterea: in eam mentis oculos cõiecitis, eius splendore capti, tot illustrissimis Principibus, magnóque Imperio dignissimis cãdidatis vestris, HENRICVM
in pe-

in petitione prætulistis. Hæc cum publicè & ex
omniū ordinum sententia atque mandato dicantur
à vobis grauissimis viris, quorum omnis vitæ actio
ab assentationis vanitate, & mendacij impudentia
aliena semper fuit, nihil est profectò quòd posthac
vnquam ad eleuandam beneficij vestri gloriam inui-
dorum vel inimicorum voces vim vllam habere pos-
se putemus. Quæ autem de recta imperandi ratione,
& optimi Regis officio, accuratè & ornatè nunc à
vobis dicebātur, ea iam pridem HENRICO Sere-
nissimo Regi Poloniae cognita, meditata, & prouisa
fuère. Nulla quippe ratio est benè gerendi, & admi-
nistrandi Imperij veterum monumentis consignata,
cuius ille partes singulas, & momenta quæque stu-
diosè non perpenderit, eo certè animo, & consilio,
non vt inani & otiosa verborum disputatione apud
eruditos se vendicaret, sed vt cognitis & perspectis
iustitiæ fontibus, quidquid inter præcepta, hone-
stum, inter exempla laudabile esset, in mores suos
priuatim, & aliquando in vsus vestros æquabili iuris
descriptione transferret. Verùm ad benè rectèque
imperādum, & ad id quod instituit, quòdque animo
conceptum habet, hanc viam certissimam & com-
pendariam semper esse putauit, Antecessorum suo-
rum Poloniae Regum vestigiis insistere, quorum
nunquam satis laudari poterit prudentia, sapientia,
fortitudo, iustitia, pietas, & reliquæ præstantes &
eximie virtutes, quas qui habent etiam in priuata

DOMINI A PIBRAC

vita, & tenui fortuna, Principes dici & haberi possunt. Harum igitur virtutum præsidio septi & muniti demortui Reges, domi & foris claruere, & ex paruo magnum hoc Imperium, quantum quantumque est, effecere. Ab illis optimæ sancitæ leges, ab illis mores sanctissimi, & præclarissima instituta profecta sunt: ab illis ordo senatorius constitutus ea potestate, quæ veteris Senatus Romani auctoritatem propè referat: ab illis denique Equestris & militaris ordinis hominibus tributæ, virtutis ergo, perpetuæ immunitates, vt non modò ipsi, sed eorum posteri, dum ex maiorum suorum virtute fructum caperent, magis ac magis ad eandem virtutem, & decus militare, accenderentur, & inflammarentur. Non putat igitur aliunde petendam sibi esse administrandi Regni regulam & rationem, quàm ex antiqua vestra consuetudine, & ex constituto olim vestro iure, à quo nelatum quidem vnguem discessurus est, nisi aut temporum ratio, aut publica vtilitas aliter suaserit. Incidunt quippe tempora nonnunquam, in quibus, vt nauigantibus interdum mutanda velificatio est, ita ab inueterato & recepto ciuitatis iure aut more recedendum. Verùm, vt scitis, in omni parte vitæ, inanis hominum cura est, & industria, sine numine diuino, & sine auxilio Dei, cuius nutu stant caduntque Imperia, & quicquid hoc cœli ambitu continetur. Etenim, vt ille rectè scribit, Nisi domum aut ciuitatem Dominus custodierit, frustra vigilat qui custodit


stodit eam: quibus verbis non modò priuatarum rerum curam & sollicitudinem, verùm etiam omnium Imperiorum genera pius ille vates, ni fallor, complexus est. Hæc igitur atque alia eiusmodi quamplurima sæpè secum reputans Serenissimus Rex Poloniæ, sic induxit in animum, omnia consilia sua, siue domi, siue foris, omnia studia & publica & priuata, omnes conatus, omnes actiones, omnes denique cogitationes suas ad Deum Opt. Max. referre. Sic à puero institutus est ad pietatem, vt nihil antiquius habeat cultu diuino, & eo cultu, quem & verum esse cultum, & Deo gratissimum pro comperto habet. Optaret quidem in re longè omnium maxima, in qua animæ salus versatur, nullam esse dissimilitudinem & disparitatem sententiarum, atque id aliquando Dei bonitate futurum sperat. Interea verò pacis & tranquillitatis amans, calamitatum etiam & malorum, quæ ex bellis ciuilibus necessariò oriuntur, alieno exemplo non ignarus, hortatur vos omnes, quotquot estis, vt communibus & coniunctis secum studiis in eam curam incumbatis, nec vllò quæsito colore securitas, pax, tranquillitas, & amicitia mutua inter vos minuat. Quod si secus factum fuerit, non dubitat, quin florētissimum hoc Regnum, dum se suis viribus confecerit, ludibrio & prædæ Moschis, Tartaris, aut aliis Barbaris sit futurum. Exciderat penè animo caput vnum orationis, quod videtur quodammodo præcipuum, illud scilicet, quo grauissima

quædam & prudentissima admonitio continetur, ne Rex electionem suam, ac tam immortale beneficium vni potius quàm alteri ordini ascribat, sed communiter omnibus ordinibus, & priuatim singulis hominibus, sine vlla distinctione se debere putet. Facilis est & expedita respõsio. Nunquam aliter existimauit Rex, quàm se pariter & singulis & omnibus debere. Mirabili enim non modò vtriusque ordinis consensione, sed concordibus omnium vestrum suffragiis se electum & renunciatum Regem esse hætenus semper credidit, neque ad veterem persuasionem aliquid addi potest. Ergo omnibus debet, imò insolidum omnibus debere vult: nec beneficij magnitudinem eleuabit aut minuet, imò augebit, numerus creditorum, quo minimè terretur, & quem ad laudem & gloriam suam maximè putat pertinere. Sed dum de referenda omnibus gratia honestas & propè quotidianas suscipit cogitationes, quod potest solùm nũc per me exequitur: Habet gratias primùm Senatui, deinde Equestri ordini, imò singulatim omnibus Senatorij & Equestris ordinis hominibus, easque magnas, maximas, ingentes, & quantas animus capere potest.


HÆC sunt quæ Serenissimus Poloniae Rex, vt vobis exponerem, nunc in aurem præcepit. Sed ille præstantia quadam animi, paucis quamplurima complexus est: ego contrà, tarditate & imbecillitate ingenij mei, multis verbis vix pauca dixi: quorum hæc est sum-

est summa, Habere vos Regem non immemorem nec ingratum, magni animi & excelsi, studiosum legum vestrarum, cupidum vtilitatum & commodorum vestrorum, bellicarum rerum scientia & gloria præstantissimum, pietatis amantissimum, Reipublicæ suæ amatorem ardentissimum: à qua se nunquam disiungi aut diuelli patietur: pro cuius salute, amplitudine & gloria, non modò facultates & fortunas omnes, sed vitam etiam & sanguinem cupiat profunderere.

I T E ergo iam nunc omnes, Rex sequitur: aut potius sequimini, Rex præit: Ingreditur in Regnum Poloniæ, bonis ominibus, & felicibus auspiciis, dextera Deo innixus, sinistra vestræ & omnium ordinum incumbens charitati.




12
 The text in this section is extremely faint and largely illegible due to bleed-through from the reverse side of the page. It appears to consist of several lines of a formal Latin or German text, possibly a prayer or a record.




The text in this section is also extremely faint and illegible, appearing as several lines of text at the bottom of the page, likely bleed-through from the reverse side.

20

Polonica Legatio





Biblioteka Jagiellońska



stdr0018103

